

SAMSDACHS EN DE EIFEL

ODER: EICHENDORFF ZWEIDAUSENDUNZWÖLF

FRANZ-JOSEF THIEMERMANN

O Däler wick, o Hüvvel,
o schöne, jröne Bösch,
schwatzwieße Fachwerk-Jivvel,
Joldammer, Määl un Mösch...

Wall dausend Blome jröbe
em Sommer-Sonneleech;
de Eifel mir zo Föbe,
de Sonn schingk en`t Jeseech.

Hell leuchte Wald un Wiese,
kaum luurt et Aug sich satt.
Verjesse es dä fiese
Radau fään en de Stadt.

Nix kann de Rauh hee stüre;
et es su kirchestell,
dat ich e Stündche nüre,
e bessje döse well.

Ich lije hingerm Wäldche
noh bei nem Jäjärsetz
und dräum vun Nachtjälliche
em Wald bei Lubowetz.

Ich dräum vun aale Zigge –
doch plötzlich weed ich wach.
Nä, sujet kann ich ligge!
Wat es dat für ne Krach?

Drei Riesentrecker knarre
de Waldwäch en de Hüh;
de Eifeljunge karre
hee Holz un Heu un Strüh.

Berchav, do kütt ald widder
ne Trecker met ener Frau.
Ich jläuv, mich pack de Zidder:
Radau, Radau, Radau!

Em Dörp vür wonnt de Bäcker.
Die Frau kurv en dat Kaff
un holt met ihrem Trecker
de Sonndachs-Brütche av.

Dä Draum vun fääne Dage,
dä es ald lang verbei:
Laut dröhnt – wat soll ich sage –
en Beiker-Kumpanei

met Helm un Ledderjacke,
zehn Mann, en junge Frau.
Wie die de Kurve packe:
Radau, Radau, Radau!

Baal sin se ald hee bovve,
Benzinjeruch – janz fing!
Un noch ens Jas jejovve,
jrad wie om Nürburging.

O Däler wick, o Hüvvel,
o schöne, jröne Wald,
schwatzwieße Fachwerk-Jivvel,
wo schrill en Kreissäch hallt.

Wer he de Fridde finge,
Romantik föhle well,
„e Leed in alle Dinge“ –

Av Mondachs es et stell!

Anmerkung:

Der Text bezieht sich auf Joseph von Eichendorffs Gedicht „Abschied“: „O Täler weit, oh Höhen, o schöner grüner Wald...“
Das Gedicht hat den Untertitel: „Im Walde bei Lubowitz“. Auf Schloss Lubowitz in Schlesien wurde Eichendorff 1788 geboren.